



KENYATAAN MEDIA

JABATAN ALAM SEKITAR PERTINGKATKAN PEMANTAUAN PENCEMARAN DAN PEMELIHARAAN ALAM SEKITAR MELALUI MEMORANDUM PERSEFAHAMAN (MoU) BERSAMA ANGKATAN PERTAHANAN AWAM MALAYSIA (APM)

Kementerian Sumber Asli dan Kelestarian Alam (NRES) melalui Jabatan Alam Sekitar (JAS) mengambil langkah proaktif dengan menjalinkan kerjasama dengan Angkatan Pertahanan Awam Malaysia (APM). Kerjasama strategik semenjak 2022 ini merupakan inisiatif terbaik sejajar dengan matlamat untuk memperkasakan program-program **penguatkuasaan, pemantauan pencemaran dan juga program-program kesedaran alam sekitar.**

Matlamat kerjasama adalah memberi fokus kepada perkongsian maklumat dan pencegahan melalui pelbagai inisiatif dalam memperkukuhkan usaha perlindungan alam sekitar dan meningkatkan kesedaran masyarakat.

Kerjasama ini menyasarkan:

- i. Dengan mengambilkira keupayaan dan keanggotaan APM yang melebihi 50,000 orang, maka pemantauan ke atas lokasi-lokasi yang dikategorikan "hot spots" untuk pencemaran berlaku dapat dipantau dengan lebih kerap. Oleh itu, kerjasama ini akan dapat memastikan **tahap keberadaan yang lebih tinggi dan jangkauan kepada golongan sasaran yang lebih luas** bagi tujuan pencegahan dan kesedaran kepada masyarakat;
- ii. Kerjasama ini akan turut melibatkan **pendedahan dan latihan** kepada Anggota APAM berhubung jenis-jenis pencemaran di bawah bidangkuasa JAS mengikut Akta Kualiti Alam Sekeliling 1974. Kolaborasi ini turut **melibatkan kaedah penyaluran maklumat** yang akan disalurkan kepada JAS untuk siasatan

selanjutnya. Anggota APM juga boleh bertindak sebagai barisan hadapan yang mencegah pencemaran dari berlaku; dan

- iii. **Perkongsian kepakaran** melalui kerjasama ini juga dapat diperkasakan, anggota JAS akan diberi latihan oleh APM terutamanya dalam pengurusan bencana, pertolongan cemas dan lain-lain perkara berdasarkan bidang tugas APM. Bagi tahun 2024, dua (2) latihan telah diadakan melibatkan anggota APM dan JAS.

Dengan termeterainya Memorandum Persefahaman ini, diharap kes-kes pencemaran alam sekitar di negara kita dapat dikawal dengan lebih efektif melalui usaha pemantauan dan penguatkuasaan yang lebih agresif. Selain dari itu JAS turut menasaskan pengurangan kes pencemaran khususnya membabitkan industri dan perkilangan dengan penguatkuasaan Akta Kualiti Alam Sekeliling (Pindaan) 2024 yang telah berkuatkuasa pada 7 Julai 2024 yang melibatkan peningkatan kadar denda dan hukuman penjara mandatori.

15 OGOS 2024
KEMENTERIAN SUMBER ASLI DAN KELESTARIAN ALAM

**Unit Komunikasi Korporat | Kementerian Sumber Asli dan Kelestarian Alam
(NRES)**

Tel: 03-8000 8000 | Faks : 03-8889 4763





Intipati pindaan Akta Kualiti Alam Sekeliling (Pindaan) 2024 ini merangkumi perkara-perkara berikut:

- i. Pemantapan hukuman penalti dengan julat kadar denda minimum tidak kurang daripada RM5,000, denda maksimum tidak melebihi RM10 juta;
- ii. Peningkatan kadar kompaun daripada tidak melebihi RM2,000 kepada tidak melebihi 50% daripada denda maksimum kesalahan berkaitan;
- iii. Pewujudan denda maksimum RM10 juta bagi kesalahan melibatkan pencemaran air, pencemaran buangan minyak serta buangan di perairan Malaysia dan pelupusan haram buangan terjadual;
- iv. Hukuman penjara mandatori tidak melebihi lima (5) tahun ke atas kesalahan melibatkan pelupusan haram buangan terjadual, pencemaran air dan ketidakpatuhan keperluan Laporan Penilaian Kesan kepada Alam Sekeliling (EIA); dan
- v. Pakaian seragam kepada semua pegawai JAS yang ditetapkan oleh Ketua Pengarah dan setaraf dengan agensi-agensi penguatkuasa yang lain.